

Romano Locci (1937-2010)

EMANUELA GOBBI, EMANUELA TORELLI
E GIUSEPPE FIRRAO *

Romano Locci, Professôr ordenari di Micologjie te Facoltât di Agrarie de Universitât dal Friûl, actinomicetolic innomenât e animadôr instancabil dal Gjornâl Furlan des Siencis, al è muart ai 22 di Març dal 2010 a 73 agns di etât, dopo une curte malatje che, magari cussì no, no i à las-sât sperance.

Ce che di plui al colpîs dal lunc curriculum dal prof. Locci e je la varietât impressionante dai interès di ricercje, svilupâts tant che autôr o co-autôr in plui di 300 articui científics e puartâts indevant in 50 agns di ativitat universitarie, prime a Milan e po a Udin.

Il mont sorprendent dai actinomicêts, un setôr di ricercje ancjemò gnûf in Italie, al atirà la sô atenzion bielzà sul tacâ de sô cariere científiche, che a 'nt restarà segnade intal profont, deventant la sô grande passion, une miniere dulà che al larà indevant a sgjavâ par dute la vite. Cun di plui, a saran il perfezionament e la aplicazion di tecnologjiis inovativis a stiçâ simpri il so interès: de tassonomie numeriche al microscopi electronic a scansion tocjant infin, tai ultins agns, la biologije molecolâr.

Nassût a Tolmin in Slovenia ai 17 di Març dal 1937, il prof. Locci, dopo vê studiât tal Liceu classic Stellini di Udin, si lauree *cum laude* te Facoltât di Agrarie de Universitât di Milan cuntune tesi su *Botrytis cinerea*, puartade indevant sot de supervision dal prof. Baldacci.

Dal 1961 al 1963 al labore tant che *assistant lecturer* tal Dipartiment di microbiologjie industriâl dal University College di Dublin, dedicantsi

* Dipartiment di Biologije e Protezion des Plantis, Universitât dal Friûl, Italie.
E-mail: giuseppe.firrao@pldef.uniud.it

cul prof. E. Küster al studi de tassonomie dai actinomicêts termofii dal teren. In Irlande al cognòs la sô femine, Jacqueline Rogers, e i coleghis che par dute la vite a restaran i siei amîs plui cjârs, lavorant insieme cun lôr ae revision de tassonomie dai actinomicêts. Il so contribût ae cognossince di chei microorganismi si concretize, une volte tornât a Milan, te colaborazion cul *International Streptomyces Project*, dulà che al lavorare ae tassonomie dai streptomicêts e ae descrizion di diviersis speciis gnovis, in particolâr de specie model *Streptoverticillium baldaccii*.

Tal 1965-1966 al ricevî une borse di studi dal CNR che i permet di tornâ a ocupâsi di tematichis di patologije vegetâl, lavorant tal laboratori dal prof. J. Kuc intal Dipartiment di biochimiche de Purdue University (Indiana, USA) su la funzion dai glicoalcaloits te resistance dai tubars di patate a *Phytophthora infestans*.

Tal 1972 i ven assegnât il premi *Justus von Liebig-Auslandsstipendium* de Universitât di Colonie in Gjermanie; ta chel an al devente professôr ordennari di Micologjie te Facoltât di Agrarie de Universitât di Milan, dulà che il so laboratori al è zaromai un centri di riferiment pal studi de biologije e de revision tassonomiche dai actinomicêts. Par cheste produzion scientifice i vegnin conferîts une vore di recognossiments, tra chescj la incjarie prestigjose di scrivi dai cjapitui dal *Bergey's Manual of Systematic Bacteriology*, che i permet di contribuî in maniere significative a prontâ la tassonomie di streptomicêts, micobateris e bateris corineformis e nocardiformis.

Di chei agns a son ancieje i tancj studis puartâts indevant dal prof. Locci sedi cu la aplicazion di metodichis microbiologjichis classichis al studi de colonizazion microbiche di mais, forment e carposfare de vît e lis analisis chimichis di metabolîts secondaris fongjins tant che lis fitotossinis, sedi soredut cu la microscopie eletroniche a scansion (MES), un cjampl dulà che al è stât pionîr, e la microanalisi a rais-X pe caraterizacion di fitopatogjens e comunitàts baterichis e pal sclariment des dinamichis di infezion e des interazions in complès plante-patogjen. Propit l'ûs inovatîf de MES i à permetût di produsi, jenfri tantis altris, diviersis maraveosis imagjins de micromorfologjie des sporis fongjinis e dai actinomicêts, cualchidune di lôr publicade in *Nature Encyclopedia of Life Sciences*.

Dal 1977 al 1979, vint vinçût une borse *Alexander von Humboldt Stiftung*, Locci si dediche ancieje al studi de colonizazion microbiche dai dispositifs protesics te Universitât di Colonie. Tal 1983 al è nomenât di-

retôr dal Istitût di Patologje Vegetâl di Milan, une incjarie che al lasse dopo dome un an, stant che, tal 1984, al acetè l'invît a colaborâ cu la gno-ve universitât dal Friûl, dulà che al ven a stâ e dulà che al tire dongje su-bit un grup di zovins ricercjadôrs. Cun lôr, sul imprin de aplicazion de biologje molecolâr ae patologje vegetâl, si dedicarà ae diagnostiche molecolâr di bateris fitopatogjens, di fitoplasmis e di fons, fint a rivâ al studi des micotossinis, e in particolâr de difusion des fumonisinis tal mais, une problematiche une vore sintude in Friûl, la sô patrie di origjin.

Il prof. Locci al è stât editor de *Rivista di Patologia Vegetale* e di *The Actinomycetes*, editor-in-chief di *The Actinomycetes*, senior editor dal *Journal of Plant Pathology*, diretôr scientifc dal *Gjornâl Furlan des Siencis* e compo-nent dal Editorial board di une vore di rivistis scientifchis. In plui, al è stât component dal Subcommittee on the Taxonomy of the Actinomycetales dal International Committee on the Systematics of Prokaryotes, cu la incja-rie di segretari dal 1970 al 1974 e di president dal 1982 al 1990. Al à insegnât Micologje par plui di trente agns, prime te Universitât di Milan e do-po te Universitât dal Friûl. Al è stât un grant insegnant, bon di trasmetti il so savê ai students cun semplicitât e clarece, e insiemit cun chel sens di rigôr che l'argoment al domandave: impussibil no fâsi cjapâ dentri dal mont de micologje, che lui al rindeve ancjemò plui interessant in gracie dal so desi-deri mai studât di conossince e di analisi. Ancjetant grande e je stade la sô funzion di vuide di numerôs arlêfs, fondade sul rispiet dal spirt creatif di ducj i colaboradôrs, sigurantjur la libertât di esplorâ i ambiti di ricercje plui adats, sburtantju a slargjâ il lôr cjamp di interès, stiçant il lôr desideri di ri-cercje cun dissipline e rigôr, simpri pront a tirâju sù e tornâ a inviâju cuant che ur capitave un insucès.

Romano Locci al veve ancje une vore di hobbies, par esempi la mu-siche classiche (al sunave il violin), al colezionave boi e al coltivave un interès profont par temis di storie sociâl, religjose e mediche, pe fotogra-fie, pe etimologje e pe scriture par furlan, une lenghe che al jere stât bon di rignuvî cu la introduzion di tiermins scientifcs gnûfs.

Al è stât un ricercjadôr dal voli svelt e viert e un mestri gjenerôs, animât di un entusiasim vulcanic cuant che si tratave di meti in pîts projets gnûfs e puartâju ae ribalte internazionâl. Cumò che nol è plui al è grant il sens di vueit che al à lassât; nus mancjarà une vore, ma il so snait e la sô ironie, col-tivâts ancje tal frontâ la malatje, a restaran par simpri un so regâl.